

全唐诗卷一百三十八

卷 138_1

【敬酬陈掾亲家翁秋夜有赠】储光羲

大姬配胡公，位乃三恪宾。
盛德百代祀，斯言良不泯。
敬仲为齐卿，当国名益震。
仲举登宰辅，太丘荣缙绅。
武皇受瑶图，爵土封其新。
繁祉既骤集，裔孙生贤臣。
特达逾珪璋，节操方松筠。
云汉一矫翼，天池三振鳞。
曳裾朝赤墀，酌醴侍紫宸。
大君锡车马，时复过平津。
言则广台阶，道亦资天均。
清秋忽高兴，震藻若有神。
曜曜趋宫廷，洸洸迈徐陈。
镐京既赐第，门巷交朱轮。
方将袭伊皋，永以崇夏殷。
宗党无远近，敬恭依仁人。
雪尽宇宙暄，雁归沧海春。
沉吟白华颂，帝阕降丝纶。
驿骑及芜城，相逢在郊鄆。
别离旷南北，谴谪罹苦辛。
昼游还荆吴，迷方客咸秦。
惟贤惠重义，男女期嘉姻。
梧桐生朝阳，鸕鶒鸣萧晨。
岂不畏时暮，坎壈无与邻。
中夜凉风来，顾我阙音尘。
琼瑶不遐弃，寤寐如日新。



卷 138_2

【苏十三瞻登玉泉寺峰入寺中见赠作】储光羲

庆门叠华组，盛列钟英彦。
贞信发天姿，文明叶邦眩为情贵深远，作德齐隐见。
别业在春山，怀归出芳甸。
逖听多时友，招邀及浮贱。
朝沿霸水穷，暮瞩蓝田遍。
百花照阡陌，万木森乡县。
涧净绿萝深，岩暄新鸟转。
依然造华薄，豁尔开灵院。
淹留火禁辰，愉乐弦歌宴。
肃肃列樽俎，锵锵引缨弁。

天籁激微风，阳光辄奔箭。
以兹小人腹，不胜君子饫。
是日既低迷，中宵方眊眩。
枕上思独往，胸中理交战。
碧云暗雨来，旧原芳色变。
欢然自此绝，心赏何由见。
鸿濛已笑云，列缺仍挥电。
忽与去人远，俄逢归者便。
想像玉泉宫，依稀明月殿。
峰峦若登陟，水木以游衍。
息心幸自忘，点翰仍留眷。
恨无荆文璧，以答丹青绚。

卷 138_3

【酬李处士山中见赠】储光羲

厥初游太学，相与极周旋。
含采共朝暮，知言同古先。
孟阳题剑阁，子云献甘泉。
斯须旷千里，婉婉将十年。
今来艳阳月，好鸟鸣翩翩。
同声既求友，不肖亦怀贤。
引领迟芳信，果枉瑶华篇。
成颂非其德，高文徒自妍。
声尘邈超越，比兴起孤绝。
始信郢中人，乃能歌白雪。
跂予北堂夜，摇笔酬明哲。
绿竹动清风，层轩静华月。
想像南山下，恬然谢朝列。
犹恐鶡鴒鸣，坐看芳草歇。
邀以青松色，同之白华洁。
永愿登龙门，相将持此节。



卷 138_4

【同诸公秋日游昆明池思古】储光羲

仆人理车骑，西出金光逵。
苍苍白帝郊，我将游灵池。
太阴连晦朔，雨与天根违。
凄风披田原，横污益山陂。
农畯尽颠沛，顾望稼穡悲。
皇灵恻群眚，神政张天维。
坤纪戮屏翳，元纲扶逶迤。
回塘清沧流，大曜悬金晖。
秋色浮浑沌，清光随涟漪。
豫章尽莓苔，柳杞成枯枝。

骤闻汉天子，征彼西南夷。
伐棘开洪渊，秉旄训我师。
震云灵鼉鼓，照水蛟龙旂。
锐士千万人，猛气如熊罴。
刑罚一以正，干戈自有仪。
坐作河汉倾，进退楼船飞。
羽发鸿雁落，桢动芙蓉披。
峨峨三云宫，肃肃振旅归。
恶德忽小丑，器用穷地赀。
上兵贵伐谋，此道不能为。
吁哉蒸人苦，始曰征伐非。
穆穆轩辕朝，耀德守方陲。
君臣日安闲，远近无怨思。
石鲸既蹭蹬，女牛亦流离。
獭獭游渚隅，葭芦生漈湄。
坎埴四十里，填游今已微。
江伯方翱翔，天吴亟往来。
桑榆惨无色，伫立暮霏霏。
老幼樵木还，宾从回轶羈。
帝梦鲜鱼索，明月当报时。

卷 138_5

【同诸公登慈恩寺塔】储光羲

金祠起真宇，直上青云垂。
地静我亦闲，登之秋清时。
苍芜宜春苑，片碧昆明池。
谁道天汉高，逍遥方在兹。
虚形宾太极，携手行翠微。
雷雨傍杳冥，鬼神中躑躅。
灵变在倏忽，莫能穷天涯。
冠上阊阖开，履下鸿雁飞。
宫室低迢迢，群山小参差。
俯仰宇宙空，庶随了义归。
崩劣非大厦，久居亦以危。

卷 138_6

【同诸公秋霁曲江俯见南山】储光羲

天静终南高，俯映江水明。
有若蓬莱下，浅深见澄瀛。
群峰悬中流，石壁如瑶琼。
鱼龙隐苍翠，鸟兽游清泠。
菰蒲林下秋，薜荔波中轻。
山戛浴兰趾，水若居云屏。
岚气浮渚宫，孤光随曜灵。



阴阴豫章馆，宛宛百花亭。
大君及群臣，宴乐方嚶鸣。
吾党二三子，萧辰怡性情。
逍遥沧洲时，乃在长安城。

卷 138_7

【同诸公送李云南伐蛮】储光羲

昆明滨滇池，蠢尔敢逆常。
天星耀鋏钺，吊彼西南方。
冢宰统元戎，太守齿军行。
囊括千万里，矢谟在庙堂。
耀耀金虎符，一息到炎荒。
蒐兵自交趾，芟舍出泸阳。
群山高崭岩，凌越如鸟翔。
封豕骤跼伏，巨象遥披攘。
回溪深天渊，揭厉逾舟梁。
玄武扫孤蜮，蛟龙除方良。
雷霆随神兵，礧礧动穹苍。
斩伐若草木，系纆同犬羊。
馀丑隐弭河，啁啾乱行藏。
君子恶薄险，王师耻重伤。
广车设置梁，太白收光芒。
边吏静县道，新书行纪纲。
剑关掉鞅归，武弁朝建章。
龙楼加命服，獬豸拥秋霜。
邦人颂灵旗，侧听何洋洋。
京观在七德，休哉我神皇。



卷 138_8

【奉和韦判官献侍郎叔除河东采访使】储光羲

天卿小冢宰，道大名亦大。
丑正在权臣，建旗千里外。
楚山俯江汉，汴水连谿沛。
两持方伯珪，再转诸侯盖。
恬淡轻黜陟，优游邈千载。
乾象变台衡，群贤尽交泰。
聿徕股肱郡，河岳即襟带。
盛德滋冀方，仁风清汾浍。
四封尽高足，相府轺车最。
超超青云器，婉婉竹林会。
贱士敢知言，成颂文明代。
燕雀依大厦，期之保贞悔。

卷 138_9

【同王十三维哭殷遥】储光羲

生理无不尽，念君在中年。
游道虽未深，举世莫能贤。
筮仕苦贫贱，为客少田园。
膏腴不可求，乃在许西偏。
四邻尽桑柘，咫尺开墙垣。
内艰未及虞，形影随化迁。
茅茨俯苫盖，双殡两楹间。
时闻孤女号，迴出陌与阡。
慈乌乱飞鸣，猛兽亦以跼。
故人王夫子，静念无生篇。
哀乐久已绝，闻之将泫然。
太阳蔽空虚，雨雪浮苍山。
迢递亲灵柩，顾予悲绝弦。
处顺与安时，及此乃空言。

卷 138_10

【贻丁主簿仙芝别】储光羲

赫赫明天子，翘翘群秀才。
昭昭皇宇广，隐隐云门开。
摇曳君初起，联翩予复来。
兹年不得意，相命游灵台。
骅骝多逸气，琳琅有清响。
联行击水飞，独影凌虚上。
关河施芳听，江海徼新赏。
敛衽归故山，敷言播天壤。
云峰虽有异，楚越幸相亲。
既别复游处，道深情更殷。
下愚忝闻见，上德犹遭迍。
偃仰东城曲，楼迟依水滨。
脱巾从会府，结绶归海裔。
亲知送河门，邦族迎江滢。
夫子安恬淡，他人怅迢递。
飞舲既眇然，洲渚徒亏蔽。
人谋固无准，天德谅难知。
高名处下位，逸翮栖卑枝。
去去水中沚，摇摇天一涯。
蓬壶不可见，来泛跃龙池。



卷 138_11

【京口送别王四谊】储光羲

江上枫林秋，江中秋水流。
清晨惜分袂，秋日尚同舟。
落潮洗鱼浦，倾荷枕驿楼。
明年菊花熟，洛东泛觴游。

卷 138_12

【同房宪部应旋】储光羲

衡山法王子，慧见息诸苦。
落发自南州，燕居在西土。
养正不因晦，得中宁患旅。
旷然长虚闲，即理寄行补。
四句了自性，一音亦非龠。
橘柚故园枝，随人植庭户。
我地少安住，念天时启处。
宪卿文昌归，愉悦来晤语。
车骑践香草，仆人沐花雨。
长风散繁云，万里静天宇。
起灭信易觉，清真知有所。
逍遥高殿阴，六月无炎暑。
微言发新偈，粲粲如悬圃。
直心视惠光，在此大法鼓。

卷 138_13

【奉别长史庾公太守徐公应召】储光羲

烈风起江汉，白浪忽如山。
方伯骤勤王，杞人亦忧天。
酆镐顷霾晦，云龙召我贤。
车骑北艰苦，舳舻西溯沿。
水灵静湍濑，猛兽趋后先。
龙楼开新阳，万里出云间。
宇宙既焜耀，崇德济巨川。
受命在神宗，振兵犹轩辕。
煌煌逾涿鹿，穆穆更坤元。
明王朝太阶，远迹望嘉言。
游子淡何思，江湖将永年。



卷 138_14

【狱中贻姚张薛李郑柳诸公】储光羲

直道时莫亲，起羞见谗口。
與人是非怪，西子言有咎。
诬善不足悲，失听一何丑。
大来敢遐望，小往且虚受。
中夜圜墙深，初秋縲绁久。
疏萤出暗草，朔风鸣衰柳。
河汉低在户，蟪蛄垂向牖。
雁声远天末，凉气生霁后。
负户愁读书，剑光忿冲斗。
哀哀害神理，恻恻伤慈母。

妻子垂涕泣，家僮日奔走。
 书词苦人吏，馈食劳交友。
 寒服犹未成，繁霜渐将厚。
 吉凶问詹尹，倚伏信北叟。
 鬼哭知己冤，鸟言诚所诱。
 诸公深惠爱，朝夕相左右。
 束湿虽欲操，钩金庶无负。
 伤罗念摇翩，跼足思骧首。
 瑾瑜颇匿瑕，邦国方含垢。
 眷言出深阱，永日常携手。

卷 138_15

【貽鼓吹李丞，时信安王北伐，李公王之所器者也】储光羲

北伐昧天造，王师示有征。
 辕门统元律，帝室命宗英。
 灵威方首事，仗钺按边城。
 膏雨被春草，黄云浮太清。
 文儒托后乘，武旅趋前旌。
 出车发西洛，营军临北平。
 曰予深固陋，志气颇纵横。
 尝思骠骑幕，愿逐嫖姚兵。
 惟贤美无度，海内依扬声。
 河间旧相许，车骑日逢迎。
 折节下谋士，深心论客卿。
 忠言虽未列，庶以知君诚。



卷 138_16

【貽王侍御出台掾丹阳】储光羲

高高琅琊台，台下生菌簕。
 照车十二乘，光彩不足谕。
 既当少微星，复隐高山雾。
 金丘华阳下，仙伯养晦处。
 茅茨对三峰，梧桐开一路。
 神溪绕皋陆，樵牧自成趣。
 时登青冥游，若从天江度。
 墟里献薇蕨，群公致衣缕。
 深沉复清净，偃仰视太素。
 猛兽识宾仆，赭霞知早暮。
 峨峨云龙开，忽有方伯遇。
 达人无不可，壮志且驰骛。
 融泄长鸡鸣，缤纷大鹏翮。
 赤墀高赳赳，一见如三顾。
 礼服正邦祀，刑冠肃王度。
 三辰明昭代，光启玄元祚。

章台收杞梓，太液满鹓鹭。
 丰泽耀纯仁，八方晏黔庶。
 沉沉闾阖起，殷殷蓬莱曙。
 旌戟俨成行，鸡人传发煦。
 翔翼一如鹖，百辟莫不惧。
 清庙奉烝尝，灵山扈銮辂。
 天街时蹴踘，直指宴榼榼。
 四月纯阳初，雷雨始奋豫。
 逆星孛皇极，鈇钺静天步。
 酆镐舒曜灵，干戈藏武库。
 析[木斯]增广运，直道有好恶。
 回迹清宪台，传骑东南去。
 列城异畴昔，近戍寡徒御。
 缠绵西关道，婉变新丰树。
 伊洛不敢息，淮河任沿溯。
 乡亭茱萸津，先后非疏附。
 炎时方怵惕，有若践霜露。
 惆怅长岑长，寂寞梁王傅。
 纷吾家延州，结友在童孺。
 岑阳沐天德，邦邑持民务。
 踟躅望朝阴，如何复沦误。
 牙旷三千里，击辕非所慕。
 秋涛联沧溟，舟楫凑北固。
 江汜日绵眇，朝夕空寐寤。
 中洞松栝新，东皋阡陌故。
 馀辉方焜耀，可以欢邑聚。
 南华在濠上，谁辩魏王瓠。
 登陟芙蓉楼，为我时一赋。



卷 138_17

【贻刘高士别】储光羲

凤驾出东城，城傍早霞散。
 初日照龙阙，峨峨在天半。
 壮哉丽百常，美矣崇两观。
 俯视趋朝客，簪珥何璀璨。
 而我送将归，裴回霸陵岸。
 北云去吴越，南雁离江汉。
 伊昔蹈丘园，翩翩理文翰。
 高谈闵仲叔，逸气刘公干。
 每言竹柏贞，尝轻朝市玩。
 山昼猿狖静，溪曛鱼鸟乱。
 宁止卧崆峒，直云期汗漫。
 圣君既理历，族士咸炳焕。
 矫首来天池，振羽泛漪澜。

元淑命不达，伯鸾吟可叹。
东去姑苏台，乃过陟阳馆。
舍辔函关道，浮舟沧海畔。
耳目旷暄凉，怀抱盈悲惋。
沉沉青岁晚，霭霭秋云换。
自言永遁栖，无复从羁绊。
挥手谢知己，知己莫能赞。

卷 138_18

【山中贻崔六琪华】储光羲

恍惚登高岭，裴回看落日。
遥想仲长园，如亲幼安室。
春渚菖蒲登，山中拔谷鸣。
相思不道远，太息未知情。
意君来此地，时复疏林保中夜扫闲门，迎晨闭菌阁。
屣履清池上，家童奉信归。
忧随落花散，目送归云飞。
故交在天末，心知复千里。
无人暂往来，独作中林士。

卷 138_19

【贻余处士】储光羲

故园至新浦，遥复未百里。
北望是他邦，纷吾即游士。
潮来津门启，罢楫信流水。
客意乃成欢，舟人亦相喜。
迟迟菱荇上，泛泛菰蒲里。
渐闻商旅喧，犹见凫鹭起。
市亭忽云构，方物如山峙。
吴王昔丧元，隋帝又灭祀。
停舻一以眺，太息兴亡理。
秋苑故池田，宫门新柳杞。
我行苦炎月，乃及清昊始。
此地日逢迎，终思隐君子。
莫言异舒卷，形音在心耳。



卷 138_20

【刘先生闲居】储光羲

高第后归道，乃居玉华宫。
逍遥人间世，不异浮丘公。
甘寝何秉羽，出门忽从戎。
方将游昆仑，又欲小崆峒。
进退既在我，归来长安中。
焚香东海君，侍坐西山童。

善行无辙迹，吾亦安能穷。
但见神色闲，中心如虚空。
期之比天老，真德辅帝鸿。

卷 138_21

【京口题崇上人山亭】储光羲

清旦历香岩，岩径纡复直。
花林开宿雾，游目清霄极。
分明窗户中，远近山川色。
金沙童子戏，香饭诸天食。
叫叫海鸥声，轩轩江燕翼。
寄言清浄者，閤閤徒自踣。

卷 138_22

【朝邑蔡主簿期不会二首】储光羲

下位日趋走，久之宾会疏。
空迟偶词赋，所愧比园庐。
朝念池上酌，暮逢林下书。
方将固封守，暂欲混畋渔。
衰柳隐长路，秋云满太虚。
遥遥望左右，日入未回车。
日入清风至，知君在西偏。
车舆既成列，宾仆复能贤。
迢递下墟坂，逍遥看井田。
苍山起暮雨，极浦浮长烟。
服义大如志，交欢数尽年。
宁言十馀里，不见空来还。



卷 138_23

【巩城南河作寄徐三景晖】储光羲

初年雨候迟，巩洛河流校。
摇摇芳草岸，屡见春山晓。
清露洗云林，轻波戏鱼鸟。
唯言故人远，不念乡川眇。
舟楫去潏回，湍激行奔峭。
寄书千里路，莫道南鸿少。

卷 138_24

【贻阎处士防卜居终南】储光羲

春风摇杂树，言别还江汜。
坚冰生绿潭，又客三千里。
兆梦唯颜色，悬情乃文史。
涤耳贵清言，披欢迟玉趾。
秦城疑旧庐，伫立问焉如。

稚子跪而说，还山将隐居。
竹林既深远，松宇复清虚。
迹迴事多逸，心安趣有馀。
石门动高韵，草堂新著书。
鸞飞久超绝，蹇足空踟蹰。
犹有昔时意，望君当照车。
驱车当六国，何以须潜默。
圣主常征贤，群公每举德。
此时方独往，身志将何欲。
愿谢山中人，回车首归躅。

卷 138_25

【新丰作贻殷四校书】储光羲

汉皇思旧邑，秦地作新丰。
南出华阳路，西分长乐宫。
安知天地久，不与昔年同。
鸡犬暮声合，城池秋霁空。
纷吾从此去，望极咸阳中。
不见芸香阁，徒思文雅雄。

卷 138_26

【华阳作贻祖三咏】储光羲

朝行敷水上，暮出华山东。
高馆宿初静，长亭秋转空。
日余久沦汨，重此闻霜风。
淅沥入溪树，飕飕惊夕鸿。
凄然望伊洛，如见息阳宫。
旧识无高位，新知尽固穷。
夫君独轻举，远近善文雄。
岂念千里驾，崎岖秦塞中。

卷 138_27

【贻袁三拾遗谪作】储光羲

倾盖洛之滨，依然心事亲。
龙门何以峻，曾是好词人。
珥笔朝文陛，含章讽紫宸。
帝城多壮观，被服长如春。
天子俭为德，而能清约身。
公卿尽虚位，天下自趣尘。
如君物望美，令德声何已。
高帝黜儒生，文皇谪才子。
朝廷非不盛，谴谪良难恃。
路出大江阴，川行碧峰里。
斯言徒自玷，白玉岂为滓。

希声尽众人，深识唯知己。
知己怨生离，悠悠天一涯。
寸心因梦断，孤愤为年移。
花满芙蓉阙，春深朝夕池。
空令千万里，长望白云垂。

卷 138_28

【洛中贻朝校书衡，朝即日本人也】储光羲

万国朝天中，东隅道最长。
吾生美无度，高驾仕春坊。
出入蓬山里，逍遥伊水傍。
伯鸾游太学，中夜一相望。
落日悬高殿，秋风入洞房。
屡言相去远，不觉生朝光。

卷 138_29

【贻崔太祝】储光羲

天都分礼阁，肃肃临清渠。
春山照前屏，高槐荫内除。
惟贤尚廩禄，弟去兄来居。
文雅更骧首，风流信有馀。
中年幸从事，乃遇两吹嘘。
何以知君子，交情复淡如。

卷 138_30

【贻王处士子文】储光羲

春草生洞渚，春风入上林。
春皋有黄鹤，抚翮未扬音。
王屋尝嘉遁，伊川复陆沉。
张弦鸛鸡弄，闭室蓬蒿深。
避地歌三乐，游山赋九吟。
大君思左右，无乃化黄金。

卷 138_31

【献华阴罗丞别】储光羲

华山薄游者，玄发当青春。
道德同仙吏，尊卑即丈人。
县城俯京路，获见官舍里。
淹留琼树枝，谗浪春泉水。
昔余在天目，总角奉游从。
寒暑递来往，今复莲花峰。
别情无远近，道别方愁予。
孰想古人言，乃知悲风雨。

卷 138_32

【闲居】储光羲

薄游何所愧，所愧在闲居。
亲故不来往，中园时读书。
步栏滴馀雪，春塘抽新蒲。
梧桐渐覆井，时鸟自相呼。
悠然念故乡，乃在天一隅。
安得如浮云，来往方须臾。

卷 138_33

【送恁上人还吴】储光羲

洛城本天邑，洛水即天池。
君王既行幸，法子复来仪。
虚室香花满，清川杨柳垂。
乘闲道归去，远意谁能知。

卷 138_34

【送周十一】储光羲

秋风陨群木，众草下严霜。
复问子何如，自言之帝乡。
岂无亲所爱，将欲济时康。
握手别征驾，返悲岐路长。

卷 138_35

【新丰主人】储光羲

新丰主人新酒熟，旧客还归旧堂宿。
满酌香含北砌花，盈尊色泛南轩竹。
云散天高秋月明，东家少女解秦筝。
醉来忘却巴陵道，梦中疑是洛阳城。

卷 138_36

【登戏马台作】储光羲

君不见宋公仗钺诛燕后，英雄踊跃争趋走。
小会衣冠吕梁壑，大征甲卒碣碣口。
天门神武树元勋，九日茱萸飧六军。
泛泛楼船游极浦，摇摇歌吹动浮云。
居人满目市朝变，霸业犹存齐楚甸。
泗水南流桐柏川，沂山北走琅琊县。
沧海沉沉晨雾开，彭城烈烈秋风来。
少年自古未得意，日暮萧条登古台。

卷 138_37

【贻从军行】储光羲

取胜小非用，来朝明光殿。
东平不足先，梦出凤林间。

梦还沧海阙，万里尽阴色。
岂为我离别。
马上吹笛起寒风，道傍舞剑飞春雪。
男儿悬弧非一日，君去成高节。

卷 138_38

【酬李壶关奉使行县忆诸公】储光羲

青枫江上沧浪吟，白月宫中鸂鶒林。
非有净清心，同道同房若断金。
离居忽有云山意，清韵遥转舟楫事。
去时能忆竹园游，来时莫忘桃园记。

卷 138_39

【蔷薇】储光羲

袅袅长数寻，青青不作林。
一茎独秀当庭心，数枝分作满庭阴。
春日迟迟欲将半，庭影离离正堪玩。
枝上莺娇不畏人，叶底蛾飞自相乱。
秦家女儿爱芳菲，画眉相伴采葳蕤。
高处红须欲就手，低边绿刺已牵衣。
蒲萄架上朝光满，杨柳园中暝鸟飞。
连袂踏歌从此去，风吹香气逐人归。

卷 138_40

【同张侍御宴北楼】储光羲

今之太守古诸侯，出入双旌垂七旒。
朝览干戈时听讼，暮延宾客复登楼。
西山漠漠崦嵫色，北渚沉沉江汉流。
良宵清浄方高会，绣服光辉联皂盖。
鱼龙恍惚阶墀下，云雾杳冥窗户外。
水灵慷慨行泣珠，游女飘飘思解佩。
苍苍低月半遥城，落落疏星满太清。
不分开襟悲楚奏，愿言吹笛退胡兵。
轩后青丘埋辍胤，周王白羽扫欃枪。
期君武节朝龙阙，余亦翱翔归玉京。